

# Rantai emas nenek diragut

Seorang lelaki bertopeng rentap rantai, tumbuk dada mangsa Stuar 10/2/2011 H3.

IZWAN ROZLIN

KUALA LUMPUR – “Saya sangka cucu pulang dari sekolah, rupa-rupanya penyamun,” demikian menurut seorang nenek, Maisaripah Men, 64, yang menjadi mangsa samun di rumahnya di Bandar Tun Hussein Onn kelmarin.

Menceritakan detik kejadian itu, Maisaripah berkata, dia didatangi seorang lelaki bertopi keledar berusia awal 20-an yang memasuki ruang dalam rumahnya jam 6.15 petang.

“Pintu pagar rumah berkunci, tetapi penyamun itu boleh capai kunci berhampiran pintu itu.

“Ketika itu saya berada di dapur, tiba-tiba saya terdengar bunyi barang terjatuh dan dilemparkan, bila saya sampai di pintu hadapan muncul seorang lelaki bertopi keledar secara tiba-tiba menyentap rantai dan terus menumbuk dada saya,” katanya.

“**Saya cam muka dia, tetapi motosikalnya saya tidak pasti jenis apa tetapi ia tidak mempunyai sebarang nombor pendaftaran.”**

Menurutnya, meskipun terkejut dan kesakitan dia sempat menjerit meminta pertolongan sambil berlari mengejar penyamun tersebut hingga ke luar pintu pagar rumah.

“Jeritan saya didengari pekerja pengubahsuaian rumah dan seorang daripada mereka cuba mengejar dengan motosikal namun tidak sempat memintas motosikal dua penyamun itu,” katanya.

Akibat insiden itu, mangsa mengalami cedera ringan pada bahagian leher namun keadaannya kini berada dalam keadaan stabil.

“Saya cam muka dia, tetapi motosikalnya saya tidak pasti jenis

apa tetapi ia tidak mempunyai nombor pendaftaran,” katanya.

Sementara itu anak mangsa, Abu Seman Siron, 41, berkata, kejadian samun sudah berlaku tiga kali di kawasan berkenaan dalam beberapa bulan kebelakangan ini.

“Kami penduduk di sini percaya ia dilakukan kumpulan sama yang sebelum ini pernah mengacukan pisau kepada mangsanya,” katanya.

Menurutnya, penduduk berharap polis dapat menggandakan rondaan di kawasan perumahan itu dan memberkas suspek terlibat yang dipercayai sudah ditahan polis beberapa kali sebelum ini.

## Maisaripah



Maisaripah menunjukkan laporan polis yang dibuat.